

四庫全書

史部

欽定四庫全書

史部

欽定續通志卷四百十八

編修臣謝振定覆勘

總校官原任侍講臣王燕緒

欽定四庫全書

欽定續通志卷四百十七

列傳

遼一

耶律赫魯

耶律實納齊

隆科

佛德

耶律允

耶律哈里

耶律達喇

蕭痕篤

康默記

延壽

韓延徽

德樞
資讓

紹勳

紹芳

韓知古

匡嗣
德疑

德源

耶律迪里

伊濟

耶律都沁

古

圖魯卜

王郁

耶律圖勒錦

耶律嘉哩

高模翰

趙思溫

耶律烏魯斯

張礪

耶律赫魯字庫們一字洪隱德呼勒部人祖實默克簡獻
皇帝兄父烏蘇約尼時為本部額爾奇木赫魯性質厚在
髻髻與太祖遊從父舒魯奇之曰與我家者必二兒也太

祖既長相與易裘馬為好然赫嚕事太祖彌謹會華格弒其父舒嚕太祖顧赫嚕曰華格弒父料我必不能容將反噬我今彼歸罪特順為解我姑與之是賊吾不忘也自是赫嚕常佩刀從太祖以備不虞居久之赫嚕父烏蘇病召赫嚕曰按巴堅神畧天授汝率諸弟赤心事之太祖來問疾烏蘇執其手曰爾命世竒才吾兒赫嚕他日可委以事吾已諭之矣太祖為塔瑪轄實呼參預部族事赫嚕領數騎召小黃室韋來附太祖素有大志而知赫嚕賢軍國事

非赫魯議不行會討裕爾庫與烏爾固部赫魯為前鋒戰
有功及太祖為德呼勒部額爾奇木討奚部其長珠爾偏
險而壘攻莫能下命赫魯持一笥往諭之既入為所執迺說
奚曰契丹與奚言語相通實一國也我額爾奇木於奚豈有
輟轡之心哉漢人殺我祖奚首額爾奇木怨刺骨日夜思
報顧力弱使我求援於奚傳矢示信耳額爾奇木受命於
天撫下以德故能有此衆也今奚殺我違天背德不祥莫
大焉且兵連禍結當自此始豈爾國之利乎珠爾感其言

乃降太祖爲裕悅秉國政欲命赫魯爲德呼勒部額爾
奇木辭曰賊在君側未敢遠去太祖討黑車子室韋幽
州劉仁恭遣養子趙霸率衆來救赫魯伏兵桃山俟霸
衆過半而要之與太祖合擊斬獲甚衆遂降室韋太祖
會李克用於雲州赫魯侍克用顧而壯之曰偉男子爲
誰太祖曰吾族赫魯也會約尼哈陶津汗歿羣臣奉遺
命請立太祖太祖辭曰昔吾祖額爾奇木雅里嘗以不
當立而辭今若等復爲是言何歟赫魯進曰曩吾祖之

辭遺命弗及符瑞未見第爲國人所推戴耳今先君言猶在耳天人所與若合符契天不可逆人不可拂而君命不可違也太祖曰遺命固然汝焉知天道赫魯曰聞裕悅之生也神光屬天異香盈幄夢受神誨龍錫金佩天道無私必應有德我國削弱日久天生聖人以興起之汗知天意故有是命且約尼九營綦布非無可立者小大臣民屬心裕悅天也天時人事幾不可失太祖猶未許是夜獨召赫魯責曰衆以遺命迫我汝不明吾心

而亦佻隨耶赫嚕曰在昔額爾奇木雅里雖推戴者衆
辭之而立蘇爾威爲汗相傳十餘世君臣之分亂紀綱
之統隳委質他國若綴旒然羽檄遽午民疲奔命興王
之運實在今日應天順人以答顧命不可失也太祖乃
許明日即皇帝位命赫嚕總軍國事時制度未講國用
未充扈從未備而諸弟埒克等徃徃覬非望太祖宮行
營始置腹心部選諸部豪健二千餘充之以赫嚕及蕭
達魯總焉已而諸弟亂作太祖命赫嚕總領軍事討平

之以功爲德呼勒部額爾奇木時民更兵焚剽日以抗
敵赫嚕撫輯有方畜牧盛滋民用富庶討烏爾固部破
之自是震懾不敢復叛迺請制朝儀建元率百官上尊
號太祖備禮受冊拜赫嚕爲阿勒達爾裕悅阿勒達爾
者遼言盛名也後太祖伐西南諸部數爲前鋒神冊二
年從逼幽州與唐節度使周德威拒戰汗州西敗其軍
遂圍幽州未下太祖班師留赫嚕與盧國用守之俄而
救兵繼至赫嚕等以軍少無援退

按五代史云契丹數
爲李嗣源等所敗乃

解去通鑑亦云契丹大敗俘斬
萬計此云兵少無獲退諱詞也
三年七月皇都成燕羣

臣以落之赫魯是日得疾薨年四十七既葬賜名其阡
音德山曰裕悅峪詔立石紀功清寧間命立祠上京初
赫魯病革太祖臨視問所欲言赫魯曰陛下聖德寬仁
羣生成遂帝業隆興臣既蒙寵遇雖瞑目無憾惟析德
呼勒部議未決願亟行之及薨太祖流涕曰斯人若延
三五載吾謀蔑不濟矣太祖二十一功臣各有所擬以
赫魯爲心云子塔喇薩喇俱不仕

耶律實納齊字薩喇六院部錫里尼固察之族始字堆
音早隸太祖幕下嘗有疾賜罇酒飲而愈遼言酒尊曰
薩喇故詔易字焉太祖即位掌腹心部天贊初分德呼
勒部為北南院實納齊為北院額爾奇木帝西征至流
沙諸部潰散命實納齊撫集之及討渤海從圍輝罕城
大譴譟降已而復叛諸將分地攻之實納齊感勵士伍
鼓譟登陴敵震懾莫敢禦遂破之天顯中卒年七十居
佐命功臣之一姪隆科佛德

隆科字薩蘭其母淳欽皇后姊也隆科幼養宮掖既長
沉毅有勇略隸太祖帳下既即位屢有戰功瑀克之亂
也欲乘不備為掩襲計給降太祖將納之命隆科耶律
允勒士卒以防變逆黨知有備懼而遁以功授右皮室
詳袞典宿衛太祖侵燕趙遇唐兵雲碧店隆科恃勇輕
敵直犯其鋒戰久之被數創歸營而卒太祖深悼惜之
佐命功臣其一也

佛德字烏庫哩弱冠事太祖天顯初為左皮室詳袞典

宿衛遷南院額爾奇木治有聲石敬瑭破張敬達軍於太原北時佛德勒兵為援敬達適敬瑭追至晉安寨圍之佛德領輕騎襲潞州塞其餉道唐諸將懼殺敬達以降會同初改德呼勒部額爾奇木為大王即拜佛德既而加採訪使舊制肅祖以下宗室稱院德祖宗室號三父房稱橫帳百官子弟及籍没人稱著帳耶律實迪言橫帳班列不可與北南院竝太宗詔在廷議皆曰然乃詔橫帳班列居上佛德曰橫帳始圖爵位之高願與北

南院參任茲又耻與同列夫橫帳與諸族皆臣也班列
奚以異帝乃詔仍舊制其強直不撓如此佛德狀貌秀

偉初太祖見之曰是子風骨異常兒必爲國器後果然

卒年四十九

按聖宗本紀統和元年賜佛德等湯藥二
年以佛德爲南京統軍使四年敗宋軍於

固安統和去天顯幾六十年佛德弱冠事太祖年止四
十九安能遠事聖宗本紀所載當別是一人弘簡錄綴
之本傳恐
未深考耳

耶律允字錫里雅圖魯卜部人祖塔雅克約尼時爲北
邊伊喇簡獻皇后與諸子之罹難也嘗倚之以免太祖

思其功不忘又多允嚴重有濟世志乃命典司近部以
遇諸族覬覦之想允既見器重益感奮思報太祖始置
宮分自衛允率門客首附宮籍帝益嘉其忠詔以塔雅
克配享廟廷及平埒克等亂以功遷奚德呼勒部額爾
奇木從征渤海有功天顯初卒後諸帝以太祖之器允
也徃徃取其子孫為友宮分中稱八房皆其後也弟轄
哩終奚六部圖哩

耶律哈里字魯爾昆約尼兆固汗之裔太祖傳位哈里

與有力焉時屬籍比局萌覬覦而約尼故族尤歛望哈
里多先帝知人之明又素服太祖威德獨歸心焉以故
太祖托為耳目數從征討既靖內亂始置約尼詳袞令
哈里領之天顯初征渤海哈里將約尼紮破輝罕城班
師卒

耶律達喇字和掄約尼森濟汗之子太祖踐阼與詳袞
哈里同心輔政太祖知其忠實命掌禮儀且委以軍事
後以平內亂功代轄哩為奚六部圖哩卒達喇善騎射

頗好禮文

蕭痕篤字裕勒沁德呼勒部人其先相約尼氏痕篤少慷慨以才能自任早隸太祖帳下數從征討既踐阼除北府宰相痕篤事親孝為政尚寬簡

康熙記本名照少為薊州衙校太祖侵薊州得之愛其材隸麾下蕃漢相涉事屬默記折衷之悉合帝意時諸部新附文法未備默記推析律意論決重輕不差毫釐拜左尚書神冊三年始建都默記董役人咸勸趨百日

而訖事五年為皇都伊勒希巴太祖出師居庸關命默
記將漢軍進逼長蘆水寨俘馘甚衆天贊四年從征渤
海後大諱譟叛命諸將攻之默記分薄東門率驍勇先
登復與韓延徽下長嶺府

按太祖紀默記攻長嶺府時為額爾奇木

軍還已

下城邑多叛默記與阿固察平之破輝發城歸營太祖
山陵畢卒佐命功臣其一也孫延壽少倜儻善騎射嘗
謂其所親曰大丈夫為將當效節邊垂馬革裹屍景宗
特授千牛衛大將軍宋人攻南京延壽奮擊陣前敵遂

大潰以功遙授保大軍節度使乾寧三年卒

按遠無乾寧年號考

景宗本紀乾亨二年宋主圓南

京以本傳合之當是乾亨之誤

韓延徽字藏明幽州安次人父夢殷累官薊儒順三州

刺史延徽少英敏燕帥劉仁恭竒之召為幽都府文學

平州錄事參軍授幽州觀察度支使及守光為帥延徽

來聘太祖怒其不屈留之使牧羊馬舒嚕后曰彼秉節

弗撓賢者也奈何困辱之太祖召與語合帝意即命參

軍事攻党項室韋服諸部落延徽之籌居多乃請樹城

郭分市里以居漢人之降者又為定配偶教墾藝以生
養之故逃亡者少居久之慨然懷其鄉里賦詩見意遂
亡歸唐已而與他將王緘有隙懼及難乃省親幽州行
過常山匿故人王德明舍德明問所適延徽曰吾將復
走契丹德明不以為然延徽笑曰彼失我如失左右手
見我必喜既至太祖問故延徽曰忘親非孝棄君非忠
臣雖挺身逃臣心在陛下臣是以復來帝大悅賜名曰
伊呼伊呼遼言復來也命為守政事令崇文館大學士

中外事悉令參決天贊四年從征渤海以功拜左僕射
又與康默記攻長嶺府拔之太宗朝封魯國公仍為政
事令使晉還改南京三司使世宗朝遷南府宰相建政

事省設張理具稱盡力吏天祿五年

連史本傳作三年今據本紀改

河

東請行冊禮帝召延徽定其制一遵太宗冊晉帝禮應
歷中致仕子德樞鎮東平詔許每歲東歸省九年卒年
七十八贈尚書令葬幽州之魯郭世為崇文令公初延
徽南奔太祖夢白鶴自帳中出比還復夢鶴入帳中詰

且謂侍臣曰延徽至矣已而果然太祖初元庶事草創
凡營都邑建宮殿正君臣定名分法度井井延徽力也
為佐命功臣之一子德樞自幼器宇不凡年甫十五太
宗見之謂延徽曰是兒卿家之福朕國之寶真英物也
未冠守左羽林大將軍遷特進太尉時漢人降與轉徙
者多寓東平丁歲灾饑饉疾癘德樞請往撫字之授遼
興軍節度使整紛剔蠹恩煦信孚勸農桑興教化期月
民獲蘓息入為南院宣徽使遥授天平軍節度使平灤

營三州管内觀察處置等使門下平章事已而加開府儀同三司行侍中封趙國公保寧元年卒孫紹勳紹芳紹勳仕至東京戶部使大延琳叛被執不屈賊以鋸解之憤罵至死紹芳開泰九年為樞密都承旨

據百官志增輯太

平四年為樞密直學士

據聖宗紀增輯

重熙間參知政事加兼

侍中時廷議征李元昊力諫不聽出為廣德軍節度使聞敗嘔血卒曾孫資讓大安八年參知政事為中京留守

據道宗紀增

壽隆初知樞密院事拜中書侍郎平章事坐

事出爲崇義軍節度使

語見道宗紀

改鎮遼興卒

韓知古薊州玉田人善謀有識量太祖平薊時知古六歲爲淳欽皇后兄允所得后來嬪知古從焉久之未得省見怏怏不得志挺身逃庸保以供資用其子匡嗣得親近太祖因問言太祖召與語賢之命參謀議太祖破劉守光軍詔赴龍化州建碑以紀功德

據太祖紀增入

神冊初

遙授彰武軍節度使信任益篤總知漢兒司事兼主諸國禮儀時儀法疏濶知古據故典酌國俗與漢儀雜就

之使國人易知而行項之拜左僕射

按太祖紀未建元之三年知古已為

左僕射

與康默記將漢軍征渤海有功遷中書令天顯中

卒為佐命功臣之一子匡嗣

匡嗣以善醫直長樂宮皇后視之猶子應歷十年為太祖廟詳袞宋王喜隱謀叛辭引匡嗣帝置不問景宗在藩邸善匡嗣即位拜上京留守加封燕王改南京留守保寧末以留守攝樞密使時耶律和克使宋還言宋人必取河東合先事為備匡嗣沮之已而宋人果取太原

乘勝逼燕匡嗣與南府宰相刷特哩袞休格侵宋軍於滿城方陣宋人請降匡嗣欲納之休格曰彼軍氣甚銳疑誘我也不聽俄而宋軍鼓譟以進匡嗣倉卒諭諸將毋當其鋒衆既奔遇伏兵扼要路匡嗣棄旗鼓遁其衆走易州山帝怒數之曰違棄衆謀深入敵境爾罪一也號令不肅行伍不整爾罪二也棄我師旅挺身鼠竄爾罪三也偵候失機守禦不備爾罪四也捐棄旗鼓損威辱國爾罪五也促令誅之皇后引諸內戚為解帝重違

其請良久乃杖而免之既而選授晉昌軍節度使乾亨

二年

按景宗紀作三年

改西南面招討使卒後追贈尚書令五

子德源德讓後賜名隆運德威德崇德凝德源德凝附傳餘各有傳

德源性愚而貪早侍景宗邸及即位列近侍保寧間

按保

寧原文作統和據傳德源以乾亨初卒乾亨為景宗年號統和為聖宗年號卒在先任反在後考德源父子兄弟俱早侍景宗邸其弟德讓德威德凝遷擢俱始於保寧德源為長兄不應始任於聖宗朝其為保寧之訛無疑

謹據改

官崇義興國二軍節度使加檢校太師以賄名德

讓貽書諫之終不悛後加同政事門下平章事遙攝保
寧軍節度使乾亨初卒

德凝謙遜廉謹保寧中遷護軍司徒統和中

按統和原
文作開泰

考聖宗紀統和三年德凝由彰武軍節度使為崇義節
度使又屬國表統和十九年西南面招討使秦党項之
捷而佚其名以事考之當即德凝
則開泰為統和之誤無疑謹據改
累遷護衛太保都官

使崇義軍節度使移鎮廣德秩滿部民請留從之改西
南面招討使党項隆伊特叛平之遷大同軍節度使卒
於官子果柔終天德軍節度使孫高嘉努終南院宣徽

使果實終遼興軍節度使

耶律迪里字烏埒濟裕悅赫魯之弟初太祖爲裕悅迪里以謹愿寬恕見器使既即位入侍帷幄與聞政事神冊三年赫魯薨命迪里爲德呼勒部額爾奇木屬以南方事會討党項皇太子爲先鋒迪里副之軍至天德雲內分道竝進迪里率偏師渡河力戰斬獲甚衆天贊初大元帥畧燕地迪里徇山西所至城堡皆下從伐渤海拔扶餘城留迪里與伊德實守之天顯二年留守南京

十年卒年五十六弟伊濟

伊濟小字烏里字伊德森幼豪爽不羣長嗜學通諸部語太祖經營之初多預軍謀天顯元年渤海平立皇太子為東丹王以伊濟為中臺省右次相時人心未安伊濟莅事勤恪威信並行太宗即位上表曰渤海昔畏南朝阻險自衛居輝罕城今去上京遼邈既不為用又不罷成果何為哉先帝因彼離心乘釁而動故不戰而克天授人與彼一時也遺種寢以蕃息今居遠境恐為後

患梁水之地乃其故鄉地衍土沃有木鐵鹽魚之利乘其微弱徙還其民萬世長策也彼得故鄉又獲木鐵鹽魚之饒必安居樂業然後選徒以翼吾左突厥党項室韋夾輔吾右可以坐制南邦混一天下成聖祖未集之功貽後世無疆之福帝嘉納之是歲詔徙東丹國民於梁水

太祖本紀作東平按遼史地理志神冊四年葺遼陽故城以渤海漢戶建東平郡天顯三年遷東丹

國民居之升為南京梁水即郡之東梁河也

人皇王奔唐伊濟鎮撫國人一

切如故以功加守太傅遷中臺省左相會同初以冊禮

赴闕加特進卒子和爾終東京留守

耶律都沁字達年六院部人祖博果濟約尼是時再為本部額爾奇木耶律朗德等既害玄祖暴橫益肆博果濟以計誘其黨悉誅夷之都沁幼有志節太祖為裕悅常居左右後即位梁人遣使求轅軸材太祖難之都沁曰梁名求材實覘我輕重宜答曰材之所生必深山窮谷有神司之須白鼻赤驢禱祠然後可伐如此則其語自塞矣已而果然天贊四年將伐渤海都沁諫曰陛下

先事渤海則西夏必躡吾後請先西討太祖從之及淳
欽皇后稱制惡都沁囚之誓曰鐵鎖朽當釋汝既而召
之使者欲去鎖都沁曰鐵未朽可釋乎后聞嘉歎趣召
釋之天顯二年卒弟古圖魯卜

古字魯爾昆初名實默克太祖為裕悅常從畧地山右
會李克用於雲州古侍克用異之曰是兒骨相非常不
宜使在左右太祖頗忌之時方西討諸弟亂作聞變太
祖問古與否曰無喜曰吾無患矣趣召古議古陳殄滅

之策後皆如言神冊末南伐以古佐右皮室詳袞隆科
與唐兵戰於雲碧店隆科中流矢傷甚太祖疑古陰害
之古知帝意請遣使問之太祖使問隆科對曰臣於古
無可疑者帝意乃釋隆科卒遂以古為右皮室詳袞既
卒太祖謂左右曰古死猶長松自倒非吾伐之也

圖魯卜字托輝幼聰敏嗜學事太祖見噐重及製契丹
大字圖魯卜贊成為多未幾為文班林牙領國子博士
知制誥明年受詔撰決獄法太祖略燕詔與皇太子及

王郁攻定州師還至順州幽州馬步軍指揮使王千率衆來襲圖魯卜射其馬躡擒之天贊二年皇子耀庫濟為大元帥圖魯卜為副既克平州進軍燕趙攻下曲陽北平至易州李景章出降言城中無鬪志大元帥將脩攻具圖魯卜諫曰我師遠來人馬疲憊勢不可久留乃止軍還大元帥以其謀聞太祖大悅賜賚優渥車駕西征復與大元帥為先鋒伐党項有功太祖擢師水精山大元帥東歸圖魯卜留屯西南部復討党項多獲而還

太祖伐大諲譔圖魯卜先登渤海平承詔銘太祖功德於永興殿壁渤海州郡復叛從大元帥攻破之淳欽皇后稱制有飛語中傷者后怒圖魯卜懼而亡太宗知其無罪召還天顯三年討烏爾固部俘獲甚衆伐唐以圖魯卜為左翼攻唐軍霞沙寨降之十一年送晉主石敬瑭入洛及大冊總禮儀事加特進檢校太尉會同五年卒

王郁京兆萬年人唐義武軍節度使處直之孽子伯父

處存鎮義武卒三軍推其子郜襲處直為都知兵馬使
梁王朱全忠攻定州郜遣處直拒於沙河兵敗入城逐
郜亂兵推處直為留後郜之亡也郁從之晉王克用妻
以女用為新州防禦使處直陰使郁北導契丹入塞以
牽晉兵且許為嗣神冊六年奉表送款舉室來降太祖
以為養子未幾郁兄都囚父自為留後帝遣郁從皇太
子討之

按五代史處直傳都反唐遣王晏球討之都與
郁復招契丹為援契丹遣萬騎救都為晏球所

敗與本
傳異

至定州都堅壁不出掠居民而還明年從皇太

子攻鎮州遇唐兵於定州破之天贊二年秋郁及阿固
齊略地燕趙攻下磁窟務從太祖平渤海戰有功加同
政事門下平章事改崇義軍節度使太祖崩郁與妻會
葬其妻泣訴於淳欽皇后求歸鄉國許之郁奏曰臣本
唐主之婿王已被弑此行夫妻豈能相保願常侍太后
后喜曰漢人中惟王郎最忠孝以太祖嘗與李克用約
為兄弟故也尋加政事令還宜州卒

耶律圖勒錦字額里音肅祖子學順之孫幼善騎射勇

而有謀略嘗侍從帷幄太宗立晉之役其父德里古為
五院額爾奇木歿於兵帝即以其職授圖勒錦會同元
年改北院大王嘗屏左右與議大事占對合帝意從討
石重貴杜重威擁十萬餘衆拒滹沱橋力戰數日不得
進帝曰兩軍爭渡人馬疲矣計將安出諸將請緩師為
後圖帝然之圖勒錦厲色進曰陛下樂於安逸則謹守
四境可也既欲擴大疆宇出師遠攻詎能無屢聖慮若
中路而止適為賊利則必陷南京夷屬邑爭戰未已吾

民無莫枕之期矣且彼步我騎何慮不克如選輕騎先絕其餉道事蔑不濟矣帝喜從其言重威果降明年春卒軍中

耶律嘉哩字布當圖魯卜部人世為小吏嘉哩早隸太宗麾下擢為軍校天顯間唐攻定州既陷嘉哩為唐兵所獲晉高祖立始歸國太宗貫其罪拜御史大夫會同九年伐晉師次潯沱河奪中渡橋降其將杜重威嘉哩與降將張彥澤率騎兵趨河南所至無敢當其鋒既入

汴嘉哩等遷晉王重貴於開封府彥澤恣殺掠亂宮掖
嘉哩不能禁車駕至京斬彥澤嘉哩亦被詰責尋釋之
天祿間加守太子太傅應歷初置本部令衮嘉哩世其
職卒

高模翰一名松渤海人有膂力善騎射好談兵初太祖
平渤海模翰避地高麗王妻以女因罪亡歸坐使酒殺
人下獄太祖知其才賞之天顯十一年唐遣張敬達楊
光遠攻太原石敬瑭求救太宗許之徵兵出太原模翰

與敬達軍接戰敗之太原圍解帝召賜酒饌翌日復戰
又敗之光遠斬敬達降帝諭模翰曰朕自起兵百餘戰
卿功第一雖古名將無以加乃授上將軍會同元年冊
禮成宴百官及諸國使於二儀殿帝指模翰曰此國之
勇將統一天下斯人力也及晉叛盟出師南伐模翰為
統軍副使與僧額前驅拔赤城破德貝諸寨遂兼總左
右鐵鷄子軍下闕南城邑數十明年敕虎官楊覃赴乾
寧軍為滄州節度使田武名所圍模翰與趙延壽聚議

往救俄有光自模翰目中出紫繞旗矛皎皎如流星模
翰喜曰此天贊之祥遂進兵殺獲甚衆以功加侍中畧
地鹽山破饒安晉人震怖不敢接戰加太傅晉杜重威
領兵三十萬來拒模翰謂左右曰軍法在整不在多以
多陵少不義必敗其晉之謂乎詰旦以麾下三百人逆
戰殺其先鋒梁漢璋餘兵敗走手詔褒美頃之杜重威
等復至滹沱河模翰守中渡橋復敗之車駕入汴加特
進檢校太師封愬郡開國公賜璽書劍器為汴州巡檢

使平汜水諸山土賊遷鎮中京天祿二年加開府儀同
三司賜對衣鞍勒名馬應歷初召為中臺省右相時北
漢為周所侵遣使求援命樸翰赴之樸翰以葦楫渡胡
盧河攻冀州周人莫敢應獲丁壯數百人而還

據穆宗本紀及

資治通鑑增入 九年正月遷左相卒

趙思溫字文美盧龍人少果銳膂力兼人隸燕帥劉仁
恭幕李存勗問罪於燕思溫統偏師拒之流矢中目裂
裳漬血戰猶不已為存勗將周德威所擒存勗壯而釋

之日見信用與梁戰於萃縣以驍勇聞授平州刺史兼
平營薊三州都指揮使神冊二年太祖遣將畧燕地思
溫來降及伐渤海以思溫為漢軍都團練使力戰拔扶
餘城身被數創太祖親為調藥太宗即位以功擢檢校
太保保靜軍節度使天顯十一年唐攻太原石敬瑭求
救帝命思溫自嵐憲間出兵援之既罷兵改南京留守
盧龍軍節度使管內觀察處置等使開府儀同三司兼
侍中賜協謀靜亂翊聖功臣尋改臨海軍節度使會同

初使晉行冊禮還加檢校太師二年卒贈太師魏國公

子延昭

通鑑作延熙為晉祁州刺史

延靖官至使相

耶律烏魯斯六院額爾奇木博果濟之後負勇畧每戰被重鎧揮鐵槊所向披靡會同問伐晉帝至河而獵縱海東青鵲搏雉晉人隔水以鵠引去帝顧左右曰誰爲我得此人烏魯斯請內殿馬濟河擒之并殺救者數人還帝大悅優加賞賚既而晉將杜重威逆於望都據水勒戰烏魯斯介馬突陣餘軍繼之被圍衆言陣薄處可

出烏魯斯曰恐彼有他備竟引兵衝堅而出迴視衆所指皆大塹也其料敵多此類是年總領迪里皮室軍坐私免部曲奪官卒

張礪磁州人初仕唐爲掌書記遷翰林學士會石敬瑭起兵唐主以礪爲招討判官從趙德鈞援張敬達於河東及敬達敗礪入契丹太宗見礪剛直有文彩擢翰林學士臨事必盡言無所避帝益重之未幾謀亡歸爲追騎所獲帝責之礪對曰臣不習北方土俗飲食居處意

嘗鬱鬱以是亡耳帝顧通事高彥英曰朕嘗戒汝善遇此人何乃使失所而亡杖彥英而謝礪會同初陞翰林承旨兼吏部尚書從帝伐晉入汴諸將蕭翰耶律朗鄂滿達輩肆殺掠礪奏曰今大遼始得中國宜以中國人治之不可專用國人及左右近習苟政令乖失則人心不服雖得之亦將失之帝不聽改右僕射兼門下侍郎

同中書門下平章事

按遼史百官志門下侍郎兼門下省同中書門下平章事兼中書省

係礪兼官原文作門下侍郎平章事者誤也謹依五代史改正

帝在汴將視朝有司給

礪三品冠服礪曰吾在上國時晉奉冊北朝賫二貂冠其一宰相韓延徽冠之其一命我服之今其可降服耶

卒冠貂蟬以朝

據五代史增入

車駕北還至樂城崩時礪卧病

恒州蕭翰等以兵圍其第數之曰汝何故於先帝言國人不可爲節度使我以國舅之親有征伐功先帝留我守汴汝獨以爲不可又譖我掠人財物子女今必殺汝趣鎖之礪抗聲曰此國家大體安危所繫吾實言之欲殺即殺奚以鎖爲滿達以礪大臣不可專殺乃救止之

是夕礪志憤卒

欽定續通志卷四百十七